

7. oktober 2025

UKA 2025/26

Domstolsstyrelse pillugu inatsisip allanngortinneqarnera pillugu inatsisit assigiinngitsut Kalaallit Nunaannut atuutilersinneqarnissaat pillugit peqqussummut missingiutip Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut.

(Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoq)

Siumup pingaartippaa nunatsinni innuttaasut kikkugaluartulluunniit toqqissisimasumik avatangiiseqarlutik inooqataanissaat, taamaammallu inatsisinik atortitsinermut suliassa qarfiup iluani inatsisit sunniuteqarluartuunissaasa aammalu ullutsinnut naleqquttuunissaasa qulakkeerneqarnissaannut Naalakkersuisut kissaateqarnerat tunngavigalugu siunnersuut manna saqqummiunneqartoq Siumumiit tikilluaqqullugulu suleqataaffigerusupparput.

Siunnersuummi matumani pineqartumi siunertat pingaarnerit ilagaat aalajangiinerit Kalaallit Nunaanni eqqartuussivinnit eqqartuussutigineqartut siunissami digitaliusumik eqqartuussutitut katersivimmi tamanut saqqummiunneqartarsinnaanerit.

Aalajangiinerit Kalaallit Nunaanni eqqartuussivinnit aalajangerneqartut, siunissami digitaliusumik eqqartuussutitut pillugit paasissutissanik katersivimmi tamanut saqqummiunneqarsinnaanngornissaat aalajangersakkap taassuma nutaap ilanngunneqarnerata kingunerissavaa.

Innuttaasut, suliffeqarfiit, pisortani oqartussat aammalu eqqartuussiveqarfimmi sullissit tamarmik tikissinnaasaanni ujaasiffigisinnaasaannilu ilineqarnissaannut eqqartuussutitut eqikkarnerisa eqqartuussutitut katersivimmut peqqussutissatut siunnersuutip massuma periarfissiissutigissavaa.

Eqqartuussutitut katersivimmik pilersitsiniarneq ilaatigut siunertaraa eqqartuussutitut paasissutissanik pissarsisinnaanermut aammalu suliassa qarfiimmut statistikkini pitsaanerusunik suliaqarsinnaanermut periarfissat patajaallisarneqarnissaat – tamannalu Siumumi ilassilluarparput – taamaattoorli eqqartuussutitut suliaasimasut ilisarnarunnaarsarneqarnissaannut tunngassuteqartut ilumut pitsaassusilimmik ilisarnarunnaarsarneqartarnissaat qulakkeerneqartassanersoq annertunerusumik paasisaqarfigerusukkatsigu Siumumiit ilanngullugu oqaatigissavarput.

Nunatsinnimi inuit ikitsunnguuvugut imminullu ilisarisimaqatigiinneq annertooq atorparput, taamaammallu millionilikkaanik inullit assigalugit ilisarnarunnaarsaanermik



toqqammaveqartinneqarnissaq nangiarnartoqarsinnaasutut isumaqarfigigatsigu ataatsimiititaliami tamassumap ukkalluarneqarnissaa Siumumiit piumasaraarput.

Siumumiit taamatut oqaaseqarluta siunnersuut aappassaaneerneqartinnani Inatsisinut ataatsimiititaliami suliarineqarluni pinissaa innersuussutigaarput.

Anders Olsen, Siumut